



# MARYMA

Ramhlun North YMA Chanchinbu

“YMA thuvawn: YMA chu tanpui ngaite tanpuitu”



YMA thiltum: 1. Hunawl hman that. 2. Zofate hmasawna ngaihtuah. 3. Kristian nun dan tha ngaihsan

Vol. 44

Issue No. 8

Ramhlun North: Ni 21 February, 2026

### BRANCH THU THAR

■ Ramhlun North Kohran Pavalai Pawl chuan Stabilizer 2kva tha tak mai min pe a, an chungah RNYMA chuan lawmthu kan sawi.

■ Ramhlun North Branch KTP ten Section tin kawt tur Kum 2026 KTP General Conference hla bu pahnih theuh (12) min pe e a, an chungah RNYMA chuan lawmthu kan sawi e.

■ Central Disaster Response Team (CDRT) member thar lawmluhna programme February ni 20, 2026 (Zirtawpni) zan dar 7:30 a Central YMA Hall, Tuikhuatlang a neih ah Branch aiawhin Pu Laldinglana Sailo, President a tel.

### SUB-COMMITTEE THU

■ **Property sub-committee:** Kar kalta Inrinni khan Library room-ah light fit belhin hnatlang an nei.

Tun Zirtawpni khan Tlangau na mic leh horn tha lote siam tha in hnatlang an nei baw.

■ **Music sub-committee:** Thawhlehi zan khan music room plug leh wall fan vuahin hnatlang neih a ni. Pu Lalneihhlu, BECM chuan current lam thil tul ang ang te a buaipuiin a fit sak a, a chungah lawmthu an sawi.

■ **Cultural sub-committee:** Zirtawpni chawhnu dar 1:00 khan RSC Field-ah Chapchar Kut inbuatsaihna atan lam zir a, Pu C. Laltlansanga, V-Sec. St. Joseph HSS Principal-in thlai lam ei leh in a tum sak a, an lawm hle.

■ **Thlanmual sub-committee:** Zirtawpni nileng khan Thlanmual lei pahifai hnatlang an nei a, mi 32 vel an thawkehhuak thei.

### SECTION THU THAR

■ **Taitesena Section:** Pu PB Lalawmpuia'n section khuang a kaih mar sak avang leh Pi VL Sangmawii'n hla bu dahna case a siamthat sak avangin lawmthu an sawi.

- **Library duty turte:**
1. Tv D Lianmanga - S-Sec.
  2. Ni Lawmsangpuii - S-Sec.
  3. Tv Timothy Lalbiakrema - S-Sec.
  4. Ni Josephine Lalthazuali - S-Sec.
  5. Ni Lalrokimi - S-Sec.
  6. Ni Lalremruati - K-Sec.

## CHHIATNI FUND KHAWN A NI DAWN

(Chhungtinah ₹ 500/- zel a khawn a ni ang)

**Ramhlun North, the 21<sup>st</sup> February, 2026:** RNYMA Executive Committee vawi 2-na thukhawm chuan March thla chung hian kan veng chungah Chhiatni Fund khawn nise tiin a rel a. He fund atana chhungtin thawh tur bituk zat chu ₹ 500/- a ni. Harsatna hrang hrang avanga bituk zat pe thei lo kan awm a nih pawhin tumah inthlahrung lo turin YMA chuan min ngen a; kan tlawmngaihna leh inpekna hi a hlu ber a ni tih kan hriat reng a pawimawh hle. Hetihruah hian, chhungkaw awm thei deuh zawkte pawhin mi dang kepna thinlung kan put a ngai a. Tlawmngaihna nena mi dangte kep leh tang thei deuh tura beisei 'Special' a khawn te pawh kan awm leh dawn a ni.

Kan chhiatni fund hman dan tlangpui kan thlir hian, mitthi pakhat zela kan senso hi a tlem lo hle a. Mitthi in lama thingpui leh sawhchiar mai bakah, a semna atana kan hman dispo cup leh plate-te, kuang man, thlan laihna senso leh mitthi buhfai kan leina ah te hian sum a kal hnem hle a. Heng bakah hian motor enkawl na te, thlanmual lama hnatlang ei leh in leh mamawh hrang hrang lei nan te, thlanmual tui bill leh electric bill zawng zawng te, thlan duanna leh thlan laih lawkna atana kan mamawh hrang hrang bakah sawhchiar siamna atana gas lakna thlengin Chhiatni Fund hi hman thin a ni.

Kum 2025 chhung khan kan sum hmuh zawng zawng hi ₹ 20,37,926/- a nih lain kan hman ral erawh ₹ 21,89,816/- zet a tling a, a kum hmasa lam balance-te nen kan inzo hram hram a ni ber mai. Tun dinhmunah kan sum hman ban hi ₹ 4,13,871/- a ni. Hetiang a nih lai hian, pawl leh thian zaho ten thlan laih man an rawn tum leh tlawmngaia thlan an rawn lai te hi thil lawmawm tak a va ni em! Hengte hi thianho leh pawl hrang hrangte tana intihhmuh chi tak a ni. Hetiang hmalakna hian kan khawtlang inpumkhatna leh thawhhona a ti nghet zual hle.

Thlan pakhat ruahman nan hian ₹ 8000/- bawr vel sen ral thin a ni a, RNYMA Executive Committee-in a lo rel angin kumin atang hian chhiat tawh chhung ten thlan siam nan ₹ 5,000/- an tum ve thung tawh dawn a ni.

SUM HMANNA TLANGPUI		
1	Mitthi senso	7,64,269
2	Dispo cup, plate, bowl, spoon leina	1,04,460
3	Zemabawk thlanmual Electric & Tui Bill	20,121
4	YMA motor diesel, siamna & silna	68,132
5	Kuang siamna bungraw leina	3,73,466
6	Music Sub-committee drums, battery etc.	28,767
7	Branch YMA Zemabawk thlanmual hnatlang senso	26,391
8	Thlanmual senso (Thlan duanna)	6,50,000
9	Gas lakna	42,910
10	Mitthi buhfai	1,03,800

## HNAME DANG PASALA NEIH LOH CHUNGCHANG INZIRTIRNA

YMA Inkhawmpui Lian Vawi 75-na, ni 21-23 October, 2025 chhunga Sakawrdiaa neiha thurel “YMA Khawih” No. 3 “Mizo hmeichhia ten hname dang pasala an neih zel loh nan Central YMA hian inzirtirna nasa zawkin kalpui rawh se” tih chu CCC Meeting-in CEC bawhzui tura a dah angin, Central YMA Executive Committee meeting chuan lo zirchiang a, ruahmannna siam turin Committee a din a. He Committee hian Central YMA tih tur bakah Branch te hmalakna tur rawtna hrang hrang an thlen.

Ni 2.2.2026 (Thawhtanni)-a Central YMA Executive Committee meeting chuan, zirchianga, ruahmannna siam tura ruat Committee ten “Branch YMA tinte an Branch YMA Chanchinbuah Hname dang pasala neih loh chungchang ti chhuak thin tur leh an mahni area theuh a Hname dang pasala nei lo tura inzirtirna Sign Board tar theuh tura ngen ni se” tia rawtna an thlen chu pawm a ni. RNYMA pawhin hemi chungchangah hian bawhzui ngaite bawhzuiin hma lak nghal a tum a, veng chhung mipui leh thalai zawk te pawhin kan hnam hmakhua thlir chungah he hmalakna pawimawh tak hi thahnemngai taka kan thlawp a pawimawh hle.



### Chhiatni Fund Chungchang

*Khawvel mihringte hi kan lo pian avang ngawtin khua leh tui nihna kan nei nghal lo va, mahni pianna khuaah ngei pawh chuan mikhual kan lo ni reng thei. Khua leh tui nihna nei tur chuan tih ngai hi a lo tam khawp mai a, chutiang dan zam sa kan tih zawh loh chuan mahni khuaah tak ngial pawh kan tui tla thei ngai dawn lo a ni.*

*Mihringte chu chhiat tawh thut thei reng kan ni a, kan inrin reng hi a tulin kan ngaihtuah ber tur pawh a ni hial awm e. Mizovin, chhiatni kan tih ber hi chu 'thihna' hi a ni a; chhungkuaah thihna thla a lo zar hian mahni chhungkaw bil chauhva insenghawi theih a ni lo va; matheilovin khawtlang hruaitute hi an inrawlh a ngai a ni. Anni'n an rel ang ang chu thu tawp a ni a; a vantlang lamte pawhin hruaitute thu leh hla hi kan zahin kan ngaihchan thiam a pawimawh hle.*

*Chhungkaw dinhmun kan inang lo na a, kan phak tawh ang zelin 'Chhiatni Fund' neih hi thil tul tak a ni a. Bungrua leh thil dang nei tha si, buai leh harsatna cho lo tak kan ni fur awm e. Kan tlin tawh ang zelin, midangte tuarna atangin kan inzir ang a, chhiatrupna hrang hrang laka kan him theih nan hma lak tum theuh ta ila.*

*Khaw chhung leh veng chhung YMA chuan, khawtlangin chhiat an tawh thulha chet dan tur felfai takin a duang a, chuta pakhat chu 'Chhiatni Fund' hi a ni. Khawiah pawh awm ila, kan awmnaah chu kan khua, kan veng a ni a; chuvangin, kan inbenbelna hmunah hian chhiatni fund hi kan ngai pawimawh hle a tul a ni.*

*Chhiatni fund hi YMA sum a ni lo va, keimahni tan a ni tih hi hre tel bawh ila. Kan kuang man atan te, mitthi ina thingpui lumna tur te, ei rawngbawl na atan te leh chhiatni kaihnhawihah a tul ang ang hman thin a ni. YMA hruaitute'n chhungkaw tinah chhiatni fund min tuksak thin a, chhiatni fund hi pek hreh reng reng tur a ni lo. Khua leh tui kan nihna tichiangtu ber pawh a ni a, a pawimawh dan hi a ril hle. Chuvangin, chhiatni fund hi kan veng chhunga chhungkaw tin hian ngai pawimawh hle ang u.*



### KHAWTHLIR

### TANGSA THAWNTHU

Mizoram Synod hnuaia 'Arunachal East' kan tih fo thin a, a hnam tam berte khi 'Tangsa' hnam an ni a, hman deuh lai kha chuan Mizo zinga a han hmu hmasatu te chuan, "Zang kawltuk (tlan tlan suh tih nen a thluk a thuhmun) ho" an ti mai thin a ni. Khatih hunlaia, kan Missionary lo awm hmasa te khan, "An mak lutuk, in han leng mah nang a, choka pahnih an nei zel!" an ti a; sawi ang tak takin han len kual chuan an in zawng zawng deuh thaw kha 'L shaped' a ni a, a L lehlam zawk chu malte chen vela sang hian a bang sir hnih an ping ve a, sir khat phe chu bang an ping lo hrim hrim a, chu pindan laiah chuan tap chhepin, chu lai chu an khual chhawna ber a lo ni a; chu pindan chu an tawng chuan Himrangh (Lalhmuak tih thluk) emaw, Rankhongh (Tlau Pawih tih thluk) an vuah a ni. An chanchin hre chaka kalte'n an zawhnaah chuan, a tu pawh mai khan Pu. Thakna Jugli (tunah chuan a chawl ta), Khasan Gaunbura (GB), Khasan Mission hmun petu kha kawm turin an lo kawh hmu zel a. Chutah chuan KM 30 vela hla Khasanah chuan zan riakin an kal ta a; chuta a thu hrilh chu a tawi thei ang berin han thai lang ila -

Keini hnam hi Chhinah (hah hi lei/earth tihna), China ram atanga chhuak kan ni a, hmun hrang hranga kan insawn kual hnu in, Burma ramah engemaw chen kan awm a; keini aia hnam lian leh chak zawk an rawn luh ve tak zel avangin chenna hmun/ram thar zuan turin kan chhuak ta a. Hlawp hnihah inthenin, a thalai rual deuhin hma kan hruai a, kan kawng sial rawn chhui zelin a chhangchhe bungbawr hovin min rawn zui thung a.

Eng emaw chen kan kal hnu chuan changel hmun pui kan thleng a, a kârah zau tawh takin kawng kan sial a, kan kal ta zel a; kan chhungte chu hun eng emaw chen kan nghak a, an rawn thlen har tak em avangin a ngaihven turin tlangval thenkhat kan tir a. Tlangval ho rawn let leh chuan changel hmun a lo phui leh vek tawh thu leh, an paltlang hnua kan chhungte kal liamna sulhnu an hmu thu te, an hnu a hlui tawh em avanga an rawn kir leh thu an rawn sawi ta mai a! Tichuan lungthlu lo zeta hma lam pan zelin tuna kan awmna hmun hi kan thleng ta a ni.

Helai hmun kan thlen a, kan han inbenbel chuan, 'Kan unaute an rawn thlen a, mahni in an puah chhunga an khawsakna'n tiin he pindan ruak hi kan buatsaih ta a; bang hmai a neih loh chhan hi chu, 'Kan unau te hi zanah rawn thleng

palh pawh ni se, ralkhat atang pawha mei eng an hmu theihna'n' a ni. Kan naupan lai thleng khan upa lam ho hian, "Chaw kha chhum ûar deuh rawh u aw, an rawn thleng tawh maithei a nia." an ti thin a, chawthing kan ring reng mai a ni. Tin, zankhua in mei hi an chhawm nung reng thin nghe nghe a ni. He pindan awm chhan hi kan thalai tam zawk hi chuan an hre tawh lo a ni.

He an chanchin a sawi hi kan Mizo thurochhiah - 'Muk thel avanga unau inhloh' nen khan a inzul hle a, Mizo zingah pawh hnam thenkhat chuan 'Changel hmun paltlang avanga inhloh' tiin an sawi ve tho bawh. Kan Mizo thu hlui lama mi ril - Pu.B.Lalthangliana chuan a lehkhabu pakhat, Mizo Chanchin (A short Account & Easy Reference of Mizo History), RTM Press Chhinga veng a chhut, kum 2009 a chhuah, pheh 19naah chuan, "...Monsang leh Mayon chi pengte chu Naga hnamah an lut tawh bawh." tiin a sawi a. Hei hi a hre fuh tawh lo emaw, a tisual palh a nih hmel a; Tangsa ho hi Naga hnamah an inchhung lut ngei a, Tangsa hnam peng - Mossang ho hi a hnam pum aiawhin a dah a nih hmel. Kan pianphung leh hmel, kan khawsak dan a inan bakah, thil hming thuhmun kan nei nual a; inang tak tak entirna'n: hâ - pâ, pî - vî leh a dang tam tak a awm a. A sawi dan inpersan zet, a tum thuhmun si chu Pibuhdeng hi a ni a; 'Nang vi cham thou' an ti a, nangṭkan, viṭpi, chamṭbuh, thouṭdeng a ni ve thap tho nia! Tin, Chhura'n Mawngping khaw pa ho a bum a, chumi hlan a nu ho a mutpui vek thu te, Ngaitei la let tura tuilian thawnthu pawh an nei ve tho zuk nia!

Hmanlai chuan mi thilpek dawn duh loh hi 'inhmuhsitna' ang hialah an ngai thin a, chutiang em em in an ngai tawh lo na a, an thawnthu leh kan thawnthu nena tang kawpin, Mizo te hi an unau an hloh tak te kha kan nih thu ka sawi thin a; anni aia Mizo kan changkan chhan chu Chanchintha a nih thu sawiin, chu Chanchintha chu an tan pawh hlu dawna kan hriat avangin, heti hian kan han thailang ve ta rawih a ni.

### JOHAN'S COMPUTER INSTITUTE (JCI)

(GOVT. APPROVED INSTITUTION)  
Near LH Thanga Enterprise, Industry Perg, Ramhlun 'N'  
Contact No. 7005608874

COMPUTER CLASS (Jan - Jun Session)

**FREE ADMISSION OPEN**

**COURSES:** 1.CCC; 2. DCA 1<sup>st</sup> & 2<sup>nd</sup> Sem  
**Timing:** 6:30am-8:30am  
10:00am-5:30pm | 6:30-9:00pm  
**Instructor:** C Lalbiaknunga (Nungtea), BE Comp. Sc & Engg.

**COMMON SERVICE CENTRE (CSC)**  
kaltlangin hengte hi kan ti thei bawh

Pan Card | Motor Insurance | Learner's Licence | Tribal/Residential/Income Certificate | Indian Passport | GST Registration | UDYUM Registration | Inhmun Hmingthlak (Sales & Gift Deed) | eRAM Revenue Train Ticket / Flight Ticket booking | Golden Card | Printing / Xerox, Laminate, etc.

**Editor:** Vanengmawia (7085878827); **Jt. Editors:** A. Lalfakzuala, Lalrotluangi Zote, , Henry VL Nghilhlova Zote

**Manager:** Lalremsanga Hnamte (8974845644); **Asst. Managers:** Zodingliana, Lalrinchhana, Lalrinawma

**News Editors:** Lalrintluanga, Lalrawntluanga, Andrew Lalmalsawma, Samuel R. Lalmangaiha, D. Lianmanga, Vanalremruatpuia Ralte

**Circulation Managers:** PB Lalhuapzauva, Samuel Lalhlupua, Hmingthanzuala, Vanlalrinkima, R. Zodinsanga, Zothankhuma, Lalrinchhana, K. Lalmuanpuia

### ZIN & HAW

- Pu Lalrochama, Vice President chu Bikaner, Rajasthan-ah thiante inneih hmangin a zin a.
- Pu Biakchungnunga, Secretary, thil pawimawh buaipuia Guwahati kal chu a lo haw leh ta.
- Pu Lalthlengliana, BECM chu Champhai ah a zin.
- NI. Lalrinsiami N-Sec. c/m chu Rural Expedition programme-in Piler, East Lungdar leh Biate ah a zin.
- Pu H. Lalhmingliana, C-Sec. thil pawimawh buaipuia Delhi-a zin chu a lo haw leh ta.
- Tv Lawmawma Ralte, K-Sec. hna thila Champhai a zin chu a lo haw leh ta.
- Pu VL Zahawma, V-Sec. chu Synod Finance Campaign in Tuithumhna ah a zin.
- NI K. Lalruatkimi d/o Thangmani (Fam), K-Sec. thil pawimawh buaipuia Delhi kal chu a lo haw leh ta.
- Pu R. Lalthakima, S-Sec. Pu Lalramthanga, K-Sec. leh Pu Malsawmdawngliana Chhangte, S-Sec. te chu Ramhlun North Taxi Stand Welfare hmingin Guwahati tlawhin an zin.
- Pu Jeremiah L Fanai, T-Sec. chu hna thilah Khawruhlian ah a zin.
- PC Lalenpuui, S-Sec. chu a hnathawhna hmun Khawruhliana atangin chawlh hmangin a lo haw.
- Pu VL Muana leh Pi C. Lalbiaknungi N-Sec. te nupa chu chhiat tawhna avangin tun kar khan Manipur-ah an zin.
- Tv. Jeffrey C. Lalawmpuia s/o C. Lalhmangaiha C-Sec. chu tun kar khan a hnathawhna hmun Chennai-ah a kal leh ta.
- Pu Lalbiakdika Ralte, K-Sec. chu Mawmrang ah a zin.

### PAWL DANG

- **Ramhlun North Football Club:** RNFC te chuan Feb 27 leh 28 hian RSC Field ah U-10 leh U-12 tournament an buatsaih dawn a, Entry Fee ₹ 200/- pekna tur Martin Collection, Ethan Go Mobile.
- **Ramhlun North Cricket Academy:** Naupang Exam chawlh hun a lo ni chho leh ta a, Ni 21.2.2026 (Inrinni) zing dar 6:00 ah RSC Field ah kal tan leh tawh tur a ni e.
- **Ramhlun North Ex-Servicemen League Unit:** Kum 2026-2028 Ramhlun North Ex-Servicemen League Unit Office Bearers te:  
President: Hon. Capt. VR Mawia Renthlei  
Vice President: Sub. PC Lianthuama  
Secretary: N/C Lalnunsiamia  
Asst. Secretary: Hav. Rorelliana  
Treasurer: Hav. Lalzuala  
Fin. Secretary: SGT. Hrangdailova

### LEI PIAH LAMAH

**Paul Lalthawmmawia,** K-33 s/o K. Lalnithanga, C-Sec. chu 15.02.2026 zing dar 02:59 khan a boral a, hemi ni vek chawhnu dar 01:00 ah Ramhlun North Thlanmual, Zemabawk ah vuiliam a ni.



**Lahlhri,** K-87 w/o Lalmuana Ralte (Fam), S-Sec. chu 21.02.2026 zing dar 8:15 khan a boral a, hemi ni vek chawhnu dar 01:00 ah Ramhlun North Thlanmual, Zemabawk ah vuiliam a ni.



Lusun khawhar chhungte thlamuanto Pathianin vengin awmpui zel che u rawh se.

### DAMLO

- Pu K. Lalruata, N-Sec. chu Ebenezer Hospital atangin in lama inenkawl chhuzawm turin a lo chhuak.
- Tv. Malsawmdawngliana s/o Lalnlanliana, V-Sec. Greenwood Hospital-a awm chu in lamah in enkawl chhuzawm turin a lo chhuak.
- Lalrinmawia, S-Sec. Civil Hospital, Aizawl a awm chu in lamah inenkawl chhuzawm turin a lo chhuak.
- Hlankima Pachuau s/o Dr PC Lalrinfela, K-Sec. chu LRM Hospital-ah hritlang khawsik avangin enkawl mek a ni.
- Samson K. Zomuanpuia, s/o Joel Lianthangpuia, S-Sec. chu khawsik avangin Nazareth Hospital-ah enkawl mek a ni.
- Pi Chawngchhungi, V-Sec. chu zunthlum leh kawthalo avangin in lamah enkawl mek a ni.
- Pi Roneihthangi, V-Sec. chu a kawng lam that loh avangin in lamah enkawl mek a ni.
- Pu Lalrinzuala, S-Sec. chu a ke artui ruh tliak avangin ni 19.2.2026 khan zai a ni a, Greenwood Hospital-ah enkawl mek a ni.
- Zolianzuala s/o Lalhualhima, T-Sec. chu Scrub Typhus avangin LRM Hospital-ah enkawl mek a ni.
- Lalremtluanga Darkim s/o RD Lalremruata, N-Sec. zunkawng a hnai awm leh khawsik avanga LRM Hospital-a awm chu a lo chhuak leh ta.

### LAWMAWM

- Pu Aris Vanneihthluanga, C-Sec. AM Hotel Management chuan Global Culinary & Hospitality Excellency Awards 2026 Mumbai-a semah Best Hotel Management Institute in Mizoram a dawng.
- Lalngaihuali d/o T. Zoramthara (Fam), N-Sec. leh Ronald Lalnunthara, Lengpui Model Veng te chu ni 20.2.2026 khan Lengpui Model Veng Presbyterian Kohhran Biak In ah an inneih.

### KEIMAHNI

- Pu Vanlalthlamuana, Director, Agriculture & Farmers' Welfare Department, T-Sec. hnen atangin Advertisement kan hmu hlauh mai a, a chungah Maryma chuan lawmthu kan sawi tak meuh a ni.

### LOCAL COUNCIL

- Ramhlun North Main road kawng dunga Zun in 5-te tifai thin turin Local Council chuan mi a ruai a. Vantlang zun-in te hi kan veng hmel lanna a ni a, veng chhung a lo fai a, kan Zun-in te a lo thianghlim zel theih nan, a neitu veng mipuite mawh ani tih i hre thar zel ang u.

### THILDANG

- Ramhlun North Branch YMA hruaitu hlui, Pu K. Lalrengpuia chu ni 19.2.2026 khan a boral a, ni 20.2.2026 khan an chenna In, Ramhlun Venglai ah vui a ni. Pu Rengpuia hi Ramhlun Veng pumpui Branch pakhat a nih lai; kum 1986-87 khan Ramhlun North Branch YMA ah Asst. Secretary a ni a. Tin, 1989-90 ah Asst. Secretary a ni leh bawk. A vuinaah Ramhlun North Branch YMA hminga pangpar dah a ni.

### Insawn:

1. Pu Biaksailova leh Pi Lalngaihawmi te nupa, Dr. John Zohmingthanga N-Sec. te in atangin Pu Lalchuanawma (L) N-Sec. te inah an insawn.
2. Pu Lalthangvunga te chung leh Pu Lalngaihawma te chung, K-Sec. te chuan an in thar K-Sec. ami chu an luah lut fel ta.

### KOHRAN

- **Baptist Kohhran:** Tun Pathianni hian Mission Committee, Ramhlun Pastor Bial hruaituten Zing Inkhawmah Campaign hun an hmang ang a, chawhnu ah Kohhran Committee leh Fellowship Department hrang hranga hruaitute nen inpawlhona neih chhuzawm a ni ang.
- **Salvation Army:** Ni 22.2.2026 (Pathianni) hi Prayer Ministry Sunday a ni a, hemi pual hian Thianghlimna Inkhawm ah Maj. Jerry Lalrozama, CO in hun a hmang ang a, Chhamdamna Inkhawmah Praise & Worship hman a ni ang.

### RAMHLUN SOUTH HIGH SCHOOL AIZAWL, MIZORAM

#### Class IX & X Admission 2026-2027

27<sup>th</sup> Feb, 2026 atangin School Office-ah admission a tih theih e (9:30AM-1:30 PM)

**Admission, Uniform, Monthly Fee - FREE**  
Smart Classroom, Extra Class & Study Camp, Science & Mathematics subject-a chaklo leh harsatna nei te a bika enkawl an ni ang.

Sport (School/District), Study Tour (Mizoram pawn), Cultural day, Career Guidance, Gospel Crusade, Filed Trip/Environmental Studies, Etc.

**Document thil tel tur:** Transfer Certificate, Permanent Education No. (PEN), Marksheet, Aahdar Card, Birth Certificate photo copy, Passport size photo-2 nos.

**Seat limit-a awm avangin a kal hmasa apiang duhsak an ni ang.**

Ph: 9774312294/9856712573/9862323177  
sd/- Headmaster (2-1)



ARTICLE

## KAN TLANGVAL LAI LEH YMA

- Malsawmthara, K-Sec.

Mitthi lumen ngai an awm chang khan tlaivar tura inngaih tlat hun kha kan nei ve a, kan zai reng chuang lo a, a lut chhuak zing pawl ah khan kan t̄ang nasa t̄hin ve a, pawn a va hawiharh piah lam ah zial zuk pah kha kan duh t̄hin a. Thingpui lumna a titi ngaihthlak tur a awm chang phei chuan Inchhung luh kha kan tum ta lo hi a ang ta ber t̄hin.

Zing khua a rawn var t̄an a, thlan i lai dawn em? tiin kan in zawt kual ve nak nak a, mahni in lam a inthlak leh rem lo deuh ah kha chuan thlanmual a kal tlang mai chang a tam bawk. Entawn tur mi hrat khawkheng hruaitu Pa Tlanga kan nei bawk a. Kekawr tlawm a hlim chho pawp a, pheikhaw a phelh a kawr ban a hlim chho leh mai a. Thlan lai thawmhna a inbel ani nghal zel mai bawk a, a fakawm t̄hin a ni. Ni a rawn tlang sang deuh a, men a har tulh tulh kan meng sen rum zel bawk a. Zingkar thlan laih hunlai te pawh a ngaihawm ta rum rum e.

Mihring te hi in kalsan a inthen zel tur kan ni si a, kan hnam nun a kan in tawrhpuia, kan in lenpui dial dial te hi alo hlu in Mitthi chungte tan a lo thlamuan thlak viau mai a. YMA in, in ang khat vek a mi lian leh mi te thliar miah lo a min tuam mawi t̄hin te hi a lo hlu takzet zet e. Thlei bik nei lo pawl ropui tak a lo ni e. Chhiat tawh thil ah chungkua in buaipui tur ni ta se, makpa nei tlem leh tam te dinhmun a inthlau in khawsak harsa deuh tan phei chuan t̄hina hi a va na leh zual duh dawn em.

Tu ta bik mah nilo kan zavai ta YMA ah hian kan theihna chin chin a tel ve zel hi Mizo kan nih chuan kan tel ve ngei a tha in chhiatni bik ah phei chuan a tello in kan in vui thei lo a ni ta hial mai Tlawmngaihna kan tihte pawh YMA hi awm lo ta se kan tunlai khawvel thliar hian chhiat tawh hi a va hreawm dawn em tih hi ngaihtuah fe tham a awm a ni. Tunlai ah chuan zing ah thlan kan lai ta lo a, tlem in tlangvalte kan hahdam ta. Mitthi lumen zawh a thlan laih te a lo awm ta lo nen, mitthi lumen tur a awm a tlaivar a ni deuh mai ta a, kan theih ang ang a mitthi lumen te leh kan chetna tur awm ah chuan theih ang ang a kan chet ve hi a lo t̄ul hlemai. Khawhar in riah te pawh tunlai ang ah kan ti ta meuh lo bawk a, tlaivar, khawhar in kal etc., te hi ani mai tawh bawk. Heng kan la tih t̄hin te ah hi chuan kan tel ve na tur ani tih hriat thar leh sauh sauh a tha hle mai.

Engtik emaw chuan khawhar lenpui ngai, menpui ngai kan nih hun a lo la thleng ve dawn si a. Kan hnam nun zemawi kan tih lan a, a ti mawi tu kan nih ve ngei theih nan kan that lai nun hi mite tan malsawmna a lo nih zel theih nan YMA hi bel zel ang aw.


**GOVERNMENT ENDALA MIDDLE SCHOOL  
RAMHLUN NORTH : AIZAWL**

(2-1)

**SCHOOL ADMISSION NOTICE**

Kum 2026-27 Academic Session atan Class-5 atanga Class-8 admission a tih theih e.

**Admission ti thar tur tan hengte hi ken tur a ni:-**

Aadhaar photocopy, PEN Number, Birth Certificate photocopy, Transfer Certificate Original.

**Hamthamna awmte:**

- 1) Free Admission
- 2) ICT Facility
- 3) Free Mid-day Meal
- 4) Field Visit
- 5) Smart Classroom
- 6) Library

**Contact:**

- 1) Miss Hmingi - 9862367995
- 2) Miss Maengi - 9862816373
- 3) Miss Lalteii - 9774610963
- 4) Sir Maruata - 8974586747



ADVERTISEMENT

**KC TUI**

Tui thianghlim tak PHE a quality test thlap, PickUp-in 2,000 litre kan pe thei reng e. Ramhlun North veng chhung tan discount kan pe e.

Ph: 7005010327 / 9774223462 (10-6)

**TLUANGTEA SEPTIC TANK SERVICE**

Septic tank khat paih leh repair kan ti thei reng a, rate chu inbiakremna a ni ang.

Contact: 6033373188/9612376373  
C/o Marina: 9436140350 (5-1)

**St. STEPHEN'S SCHOOL**
**RAMHLUN 'N, AIZAWL** (3-1)

**ADMISSIONS H/S & HSS (Arts & Sc)**

\*Zirtirtu tha tak te enkawlina hmun

\*Zirlaibu piah Nunphung leh Hmathlir zirtirna

\*Thiamna a taka hman tangkai zirtirna hmun

Follow us @ Instagram & Youtube

**RESULTS : HSS(Arts) 100% Passed (2017 to 2025)**  
# Free Admission CI-IX : 9774632726 / 9436353625

**HOLY CHILD SCHOOL, RAMHLUN NORTH  
OPEN ADMISSION FOR 2026-2027**

Kum 2026-2027 session atan Holy Child School ah Nursery leh KG lut turte tan Admission hawn a ni leh dawn a. Ni 2 February, 2026 atangin School ah admission a tih theih ang.

Hrechiang duh tan a hnuaiia Phone number tarlan ah hian zawhfiah theih reng a ni.

9436154080 holychildschool143@gmail.com (5-5)


**ADMISSION NOTICE**

Govt. Ramhlun North P/S ah kum 2026 Academic Session atan admission a tih theih ta e. Office hun chungin admission form la in a in admit theih e.

Hriatchian duh nei tan a hnuaiia number tarlanah te hian zawhfiah theih a ni : (3-3)  
9862300713/ 9615842618/9862013295/9862075945

**AR-ELLS SCHOOL : CHALTLANG  
RUAM VENG**

Kum 2026 – 2027 session atan Nursery to Class XII (Science) ah tehian admission hawn tan a ni. Office hour chungin school-ah Prospectus leh Admission form a laktheih e.

Sport lama tui mite tan concesson pek a ni ang.

Contact : 7005563110 / 9612235703 (3-3)


**ST. ANTHONY'S HIGHER SECONDARY SCHOOL  
CHALTLANG LILY VENG, AIZAWL** (7-5)

Kum 2026-2027 session atan Class-XI to Class-XII Arts admission kan hawng leh ta e.

1. Kan zirlaite hi Pathian thu nen Discipline tha tak hnuaiia enkawl an ni. HSLC/HSSLC exam ah Top-4, Top-6, Top-7, Top-9 leh Subject topper te kan nei tawh.

2. HSLC/HSSLC exam-ah result tha tak kan nei t̄hin.

3. Board Exam-a kan zirlai Top Tenner-te ` 1,00,000/- leh Subject topper-te ` 30,000/- pek t̄hin a ni.

4. Kumtin Study Tour neih t̄hin a ni. Kumin hian Kolkata, Delhi, Chennai kal tum a ni. Hostel nuam leh changtlung tak a awm bawk e. Ph: 9612131959/9862732487/8575827857

## BEHLIANG CHIN I UAR ANG U

- Sawrkar laipui ruahmanna angin behliang dal hi NAFED & NCCF -in Mizoram-ah Agriculture & Farmers Welfare Department kaltlangin kg khat cheng 80 in (behliang mu chang/ behliang dal) a lei dawn.
- Behliang hi a hring chauh ni lovin, a mu tih ro hi dal angin a ei theih.
- Kan ei thin Dal/Dailuah ai hian man to leh tha zawk a ni a, vai-ho pheih chuan an duh zawk a ni.
- Behliang hi thlai tuarchhel leh thlai kumhlun a ni a, kum 5 chhung a rah a seng theih.
- A hnah a til zung zung a, huan-lo-ram lei a ti tha chak hle.
- Behliang hi Mizoram hmun hrang hrangah a tha duh em em a, buaipui manhla tak a ni.
- Hre chiang duh chuan District tina Agriculture Office-ah zawh fiah theih a ni.

**Issued by:**

**Department of Agriculture & Farmers'  
Welfare, Mizoram, Aizawl.**

## **SAWHTHING KARA NIHAWI CHIN PAWLH**

- Sum lak luh tih pun nan Sawhthing karah Nihawi ching rawh.
- September/October thla tirah Nihawi chu Sawhthing bi karah chin mai tur a ni.
- Sawhthing kara Nihawi chin hian Sawhthing tâm tur eng emaw chen a veng thei.
- Nihawi hlim hi Sawhthing-in a ngeih hle a, an zung thlak chin a in chen loh avangin lei tha mamawh lak luh kawngah an inti buai lo.
- Nihawi nena chin pawlh hian Sawhthing buk a ti rit.
- Nihawi hriak sawr hmang hian mahni tel hman tur kan intodelh thei.

**Issued by:**

**Department of Agriculture &  
Farmers' Welfare, Mizoram, Aizawl.**